

Ubvur umbɔ aka atsenge abi

Uibrani

Utsutson ri itsi ubvur Uibrani

Anasi ihwengmbɔ unerwi aka atseng ubvur uwurɛ. Anera akaiferhkɔ ugɛ aka atsengmbɔ ubvur uwurɛ ri Iya-Num ru Urusharhima idərhi isipa ra amɛk aki 70 udzur ru unumkpi umbɔ aka amar Uyesu.

Atseng ubvur ha ri ivangyɛ abika adɔsa abɔɔ, abi Uyahuda, aka atirhi ikorhe ikpũ amɛn rakɔ ugɛɛ ani irhɛm umbɔ ugɛ umbɔ abɔre imangmangmbɔ. Idɛɛ iwengge ugɛ abika adɔsa ha awe ru uver. Atseng ubvur uwurɛ afituwe ikpũ aner abɛrɛ.

Ubvur uwurɛ udɛyiwe ugɛ igɔng nu ijee Uyesu inangngge iyi ípfu itser-Num, nu Umusa, nu abika asɔm Arherhu-Num, nu Akagɔng Abika Adzowe Idɛm-Num uwu ibibemuwe iyiki igbe. Itser ififorhyɛ Unum aka atsu ngge itsuifer ru ubok akpe Uyesu ngge iwu udĩ ififorh ha Unum aka agbisha udzur ri inggbaashia. Idzowe idɛm-Num nu ízũwã iyi ibibemuwe iyiki igbe kishoo iwe nyaka ri itsi akpe Uyesu. Awu ru ubok ibiba Uyesu umbɔ aka adzowe ibibemuwe iyiki ifa, iyiriye iki iwu iyiki izea. Ri imimasha, ubvur ha ikɛi ufituwe imangmang abika adɔsa nggu iker akarhãrhã ru nyaku nggaa abi imangmang aka akorhe ru utsutson abi Uisrairha.

Abinkɛ aka awe umɔ

Uyesu adɛyiwe iwiwe Unum (1.1-3)

Uyesu ananga ípfu itser-Num (1.4–2.18)

Uyesu ananga abika asəm Arherhu-Num (3.1–4.13)

Itser iyiki idzowe idəm-Num iyi Uyesu inangge iyi Uharuna (4.14–7.28)

Ibibemuwe iyiki ifa inangge iyiki igbe (8.1–10.18)

Ugar imangmang (10.19–12.29)

Imimasha (13.1-25)

Ungwēwi aka ananga ípfu itser-Num

¹ Isha, Unum arherhe arherhe nggu atokamən ra angwĩ abika asəm Arherhu-Num ri ivanga irhēirhē ra atsīndīā arhērhe.

² Bər ri ivang iyiki imimasha iyere unga arherhuwa umən arherhe ra angwĩ Ungwēnga. Unga aka atsū unga awe uner ukam abina kishoo. Ru ubok ungwē hā Unum aka amunu upfunga ikēi.

³ Ungwē hā unga adēyiwe irhirhang Unum na awe uzirhzi Unum, na awu icaica nggu unga. Unga akpəm abina kishoo ra arherhanga aki ijee. Unga aka amaa igbishu utsīndī uwuku usorhe arhim, unga aseisa ru ubok ugha Uwuku Ugōnga ra afā.

⁴ Nggee unga ananga ípfu itser-Num, rimi hā, itsokyē umbə aka adzowe unga inangke ikimbə.

⁵ Awu ipfu itser-Num iyikisong Unum aka ayisa ngge agē,

<<Ungo uwu Ungwēmum,

irherē umum iwu Utēngo?>>*

Use ikēi unga agər ngge agē,

<<Uмум iwuri iwu Utēnga

nu unga awu ungwēmum?>>

* 1:5 Àka anyā ikēi: Amb 2.7.

6 Nu ikei, ivangye Unum aka akũ ukã ungwẽnga
aba ru upfung, unga agor age,
<<Uneke kishoo ípfu itser-Num idzowe unga
igong.>>†

7 Arherhi ípfu itser-Num, unga agor age,
<<Unga atsu ípfu itsernga ngge iwe ru nyaku ugba,
na atsu umbɔ awe ru nyaki ikonrha
ri itserye umbɔ aki itõwe unga.>>‡

8 Bɔr ru Ungwẽnga unga agor age,
<<A Unum, Iyerhango iwuri iwu ugbagbaa,
nu ungo uwuri ikũ igbong iyiki igha
Iyerhango
ukũ ugha Iyerhe idzidzerhe.

9 Ungo uku ubemu uben irhirhika nu ukpẽɔ uben
iki ibewe,
nggee, Unumngo aka atsu ungo unango
awerhango
ri idzukuwa ungo atsei anggɔm.>>§

10 Ikei unga agor age,
<<Utirhi ri inggbaashia, A Uteijee,
awu ungo udzin atarh idzin abĩ,
nu afã awu itser abokngo.

11 Umbɔ awuri itsĩme ake,
bɔr ungo uwuri iwe umɔ uben ivang.
Umbɔ awuri ishaka ugɛɛ atorho aka agbe.

12 Ungo uwuri ifeta ake ugɛɛ atorho,
awuri ifara ake ru nyaka umbɔ iki ifaru un-
tama.

Bɔr ungo uwe ru nyaka ungo uku uwe,
nu imekngo isi ímaangge.>>*

† 1:6 Àka anyã ikei: 2Usm 7.14; 1Ats 17.13. ‡ 1:7 Àka anyã ikei:
Amb 104.4. § 1:9 Àka anyã ikei: Amb 45.6,7. * 1:12 Àka anyã
ikei: Amb 102.25-27.

13 Ipfu itser-Num iyikisong Unum aka agər ngge agɛ,

<<Usei nu ubok ughamum
utɛku umum iki itsu anggamtsakngo
awe ubin uku utsorhe andaidakngo?>>†

14 Bər ípfu itser-Num kishoo akpurha awu awɛ
itser Unum aka adene ngge iyike abirabɛ aka igha
ukam ififərɥ.

2

Igbiiir ato ri ingwɛ amɛnmɛn

1 Ri itsi akɛɛ ha awu ufang umɛn ingwɛɗzen ni
ingwɛ amɛnmɛn ra abinkɛ umɛn iki igũ, utsur abin
akɔɔ atsu umɛn iyapumɛn.

2 Isarheyɛ umbɔ aka adzaa umɛn ra angwĩ
ípfu itser-Num iděě ikerngge, nu ubɛn uwuku
uzharhuwe ngge use asi idɔsunga ngge, akpo
ufaikpi uku uměě.

3 Ngge iba iwe rimi, umɛn ikorhi iguse ni ishɔɔr
umɛn ĩba isi ingwɛmɛn amɛnmɛn ru nggaa ififərɥ
ha umɛn iki igũ? Ififərɥ iyɛɛ, Uteijee nibikanga
agbaashia adũwã ngge, abirabɛ aka agũ ngge agər
umɛn agɛ iwu idzidzɛrhe.

4 Unum ikei atomuwe ngge ideka ra atsar nu
abin igbigba nu idzeu nu ízũwã iyi Ipfu Isarsa-
tangge unga aka agasha ru nyaka unga aka abee.

Uyesu awu udzumu uner

5 Upfung ukpuku uba, ukpurukpi umɛn iki
irherhe ri itsi ukpɔ, Unum asi ítsu ípfu itser-Num
agha iyɛrhakpɔ.

† 1:13 Àka anyã ikei: Amb 110.1.

⁶ Bɔr anang akɔɔ aweke uner uwɔɔ aka adzowe ideka ri itsɛng Arherhu-Num agɛ,

<<Anera awu use ungo uku utsu umbɔ ri ifɛrhkɔngo,

awɛkaci anera awu use ungo uku udzɛu umbɔ rimi?

⁷ Ungo utsu umbɔ awe abirabɛ ípfu itser-Num inangngge umbɔ ri ivanga ukunjiir.

Ungo ukare umbɔ ikpikpoi nu imor,

⁸ nu utsuke ubɛn ubin ra andaidakmbɔ.>>*

Ivanyɛ Unum aka itsuke abina kishoo ra andaidakmbɔ, unga asi ínekuka ubin ukpɔɔ uku usi iwekpɔ ri ijeembɔ. Bɔr icɛɛ umɛn isi inyãmɛn ubɛn ubin uwekpɔ ri ijeembɔ.

⁹ Bɔr umɛn inyãmɛn Uyesu uwuruwi umbɔ aka atsu ípfu itser-Num inangngge unga ri ivanga ukunjiir. Icɛɛ umbɔ aka akare unga ikpikpoi nu imor ubinkutsu unga ahwa uver akpe, ngge itsú unga ru ubok imimutu Unum unga akpe ri iyike ubɛn unera.

¹⁰ Unum unga amuna abina kishoo, abina kishoo awu akinga. Imɛɛngge unga akũ anera arherhɛ aba ru umbɔ agasha ri ikpikpoinga. Unga akorha akɛɛ ri itsu Uyesu awe undzumunga ri ihwa ayetnum na adarh umbɔ azĩ ri ififɔrh.

¹¹ Uwuku utsu anera awu asarsatambɔ nggu abirabɛ aka atsu umbɔ asar, Utɛmbɔ awu unying. Nggee Uyesu asi igũa atsa iyisa umbɔ agɛ, <<Umbi awu angwɛmɛn nu anapumɛn.>>

¹² Unga agɔr agɛ,
<<Umun iwuri idũwũ itsokngo ra angwɛmɛn nu anapumɛn,

* **2:8** Àka anyã ikɛi: Amb 8.4-6.

ra asu ikikang anerngo
 umum iwuri itsũ ubom ukpuku ukpoi
 ungo.>>†

13 Na age,
 <<Umun iwuri itsu imangmangmun ru unga.>>‡
 Ikei unga agor age,
 <<Umun uwi nggu anerabe Unum aka adzaa
 umum.>>§

14 Iki iwe uge abi ha awe ru ijuε nggu adzirh,
 unga awe ubina unying nggu umbɔ ri iyor, ngge
 itsũ unga ru ubok akpenga, awuri atsime Un-
 denggũ, uwuruwi aka akpɔm ijee akpe.

15 Na awuri ifɔnuka abirabe iwei akpe iki itsu
 umbɔ igārḥā ru kishoo ibibekmbɔ.

16 Awu idzidzerhe uge unga asi ibanga iyike ipfu
 itser-Num, bɔr ayike anang Uibrahim.

17 Ngge itsu awu ufang unga awe ru nyaka
 angwēmbɔ nu anapumbɔ ra atsīndīā kishoo, ngge
 itsũ unga awu Ukugang Uwuku Udzowe Idem-
 Num uwuku utōitser Unum nggu idzidzerhe nu
 atorh, na awe idem iyiki itsũwe arhim anera.

18 Unga imēē iyike kishoo abirabe umbɔ aka
 avira umbɔ, ubinkutsu unga nibikanga ahwaa
 ayetnum ri ivang iviviranga.

3

Uyesu ananga Umusa

1 Nggee, asarkasar angwēmēn nu anapumēn,
 abirabe umēn iki iwu awerhe ru ubok iyiyisa iyi
 Unum, aka atsu iferhkambi ru Uyesu, uwuruwi

† 2:12 Àka anyā ikei: Amb 22.22. ‡ 2:13 Àka anyā ikei: Uish 8.17.

§ 2:13 Àka anyā ikei: Uish 8.18.

umɛn iki ɪdekuwe uge unga awu nggaa uner itser Unum na awu Ukugɔng Uwuku Udzowe Idɛm-Num.

² Unga akorhunga kishoo abinkɛ uwuku usɛng unga aka abee unga akorhe, ru nyaku Umusa aka akorhe abinkɛ aka amɛɛ unga akorhe ri iyike abi Unum.

³ Uyesu amɛɛ ikpo nggaa imor ananga Umusa, ru nyaku uner uwuku udzin iya aka awe ru imor ananga iya ha.

⁴ Ubɛn iya awu unera adzin ike, bɔr Unum unga adzin ubɛn ubin.

⁵ Umusa akorhe abinkɛ aka amɛɛ ugãrhã akorhe ri iyike abi Unum, ri adzowe ideka ra abinkɛ Unum aka irherhe unuma.

⁶ Bɔr Ukiristo ani ikorhe ubɛn ubinkpi uku umɛɛ Ungwɛ akorhe ra abi Unum kishoo. Nu umɛn iwe abi Unum, umɛn ɪba ikpɔmɛn ubinkpi umɛn iki ifosa nggu ikeramɛn nu isheri iwei.

Igbiite ato abika asheri imangmang

⁷ Nggee, Ipfu Isarsatangge igɔr igɛ,
<Irherɛ, umbi aba agũmbi urhɛm Unum,

⁸ àka niba awembi abi ikertsi
ru nyaka atokambi aka akorhe ri ivang isoyi amɛn
hã,
ri ivang iviviri ra arhum.

⁹ Nggɔɔ ha atokambi aka avira umum,
imɛka isɔka inaa, umbɔ anyãmbɔ ubinkpi
umum iki ikorhe.

¹⁰ Ngge itsu umum igũ avɔm nggu udan ukpɔrɔ ha,
umum igɔr igɛ, <Ubɛn ivang amɛnmbɔ ani
iyapa,
na asi ihwɛngmbɔ atsĩndĩmum.>

11 Nggee umum itsu ra avəmmum iyirh ãge, <Umbə
asi ãtsĩmbə ri iwiwoshamum.> >>*

12 Àka angwēdzən, umbi angwēmən nu ana-
pumən, utsur unera ru umbi awe ra amən aka
abewe akika isheri imangmang atsu unga adzipu
undzingnga ru Unum uwu urhə.

13 Bər àka afituwe adəka ubən unum, ubən
unumkpi umbə iki iyisa <<Irherə,>> ngge itsú un-
ying ru umbi asi íwea uner ikertsi ri itsi irhirhəm
iyi arhim.

14 Umən iwu awərha nggu Ukiristo umən ĩba
ikpəmmən imangmangmən iyi inggbaashia izĩ
itsĩmən imimasha.

15 Ru nyaka ngge iki igər ugə,
<<Irherə, umbi aba agũmbi urhəm Unum,
àka niba awembi abi ikertsi
ru nyaka atokambi aka akorhe ri ivang isoyi
amən hã.>>†

16 Awu umbə ungamə agũ urhəm Unum na asoyi
amən? Asi iwea umbə ha kishoo Umusa aka akũna
umbə adzek ra abĩ Umasar?

17 Awu nggu umbə ungamə unga aka agũ avəm
iməka isəka inaa? Asi iwea nggu abika akorha
arhim, ayormbə aka akpe ra arhum?

18 Awu umbə ungamə Unum aka ayirh uyirh ugə
umbə asi ãtsĩmbə ri iwiwoshanga? Asi iwea umbə
abika akpē ididəsa?

19 Nggee umən inyāmən umbə asi idēē atsiĩmbə,
ubinkutsu ida imangmangmbə itsu.

4

Ivang iwiwosha aner Unum

* **3:11** Àka anyā ikei: Amb 95.7-11. † **3:15** Àka anyā ikei: Amb 95.7,8.

¹ Nggee, ngge iki iwe uge ibibemuwe ivang iwi-wosha iki idēēngge iba itsĩ icere, umen ingwēdzēn utsur uwō ru umbi asi ikpoa itsitsĩ ru ngge.

² Umen iki ĩgūmen Isarhe Iyiki Ize umbō aka adzaa umen, ru nyaka umbō aka agū, b̄ar isarhe ha umbō aka agū ishingge ru ugarh ru umbō, ubinkutsu, umbō asi iyēimbō ngge nggu imang-mang ru nyaka abika adōsa.

³ Umen iki iwe ru imangmang umen itsĩ iwi-wosha ha, ru nyaku Unum aka aḡor age,
<<Nggee umum iki itsu ngge nu uyirh nggu av̄ammum ĩge,

<Umbō asi ĩtsĩmbō ri iwiwoshamum.> >*>

Nu ngge iki iwe uge unga amaa itsernga udzur ri ivangye unga aka amunu upfunga.

⁴ Itseng Arherhu-Num irherha arherhe ri itsi unuma utōva igē, <<Ru unum ukpu utōva Unum aka awosha ri itsernga kishoo.>>†

⁵ B̄ar ru ubvur ha Unum arherhe age, <<Umbō asi ĩtsĩmbō anang iwiwoshamum.>>

⁶ Inang iwengge uge abō awuri itsĩmbō iwi-wosha ha, b̄ar abirabē aka agbaashia agū Isarhe Iyiki Ize ha asi itsĩmbō, ubinkutsu, ida idōsumbō itsu.

⁷ Nggee Unum ikei abvui atsu unum ukpō, ay-isa age, <<Irherē.>> Unga arherha akere ra angwĩ Udauda ri ivangye imeka irheirhe iki itōng, age,

<<Irherē umbi aba agūmbi urhemmum,
àka niba awembi abi ikertsi.>>‡

* **4:3** Àka anyā ikei: Amb 95.11. † **4:4** Àka anyā ikei: Ing 2.2.

‡ **4:7** Àka anyā ikei: Amb 95.7,8.

⁸ Ujoshuwa asi idēē adzowuka umbō iwiwosha, ngge itsu Unum arherha arherhe ri itsi unum ukpōo uku iba.

⁹ Nggee, unum ukpuku uwosha ra aner Unum una uwe umō ru nyaku Unum aka awosha ru unum ukpu utōova.

¹⁰ Uben unerwi aka atsī ri iwiwoshu Unum unga akpowe itsinga iwiwosha ri itsernga, ru nyaku Unum aka akorhe ri iyinga.

¹¹ Nggee, awu ufang umen ikorhu uben ubinkpi umen iki idēē ikorhe ri ikpo itsī ri iwiwosha ha, ngge itsú anera niba atsīmmbō ri itsi ida ididōsa ru nyaka abi Uisrairha aka akorhe.

¹² Uben arherhake Unum aka arherhe, aweke ru urhe nu iker. Agha anangke uben ikon ikider iyi angwīā avaa. Ngge idēē izharhe igashuwe ipfu nu urhe, ikei agau icim nggu apfupfu. Adēē ahwengke uben iferhkō nu amen anera.

¹³ Ubin ushikpō ra abinke aka amuna kishoo aka awōk ru Unum. Abina kishoo awu ukupēē ra asunga. Awu ufang umen iki ivarhuwe unga abinke umen iki ikorhe kishoo.

Uyesu Ukugōng Uwuku Udzowe

Idem-Num

¹⁴ Iki iwe uge umen iwemen ru ukugōnga ra Ukugōng Uwuku Udzowe Idem-Num aka atsīā ra afā, Uyesu Ungwē Unum, nggee umen ikpōm imangmangmen iker.

¹⁵ Umen isi iwemen ru Ukugōng Uwuku Udzowe Idem-Num aka asi igūa atorh ru ida ikermen, bōr umen iwemen ru uwōo uwuruwi umbō aka avira unga ra atsīndīā kishoo, ru nyaka umbō aka avira umen, bōr unga ashia ra arhim.

¹⁶ Nggee umɛn ĩba nggu ikeramɛn ru Unum uwu-
ruwi aka awe ru inna, ngge itsú umɛn iyɛi atorh nu
umata ukpuku uyika umɛn ri ivang iyiki ibibee.

5

¹ Aka isaka asɛng ubɛn Ukugɔng Uwuku Udzowe
Idɛm-Num ra akatsak na atsu unga awe asumbɔ ri
itser-Num, unga awuri iyɛruwe izũwã nu idzowe
idɛm-Num ri itsi arhim.

² Unga iděě angwědzɛn nggu abika asheri ih-
wihwɛng abika ayapa, ubinkutsu unga awea ru
ida iker iganga.

³ Akɛɛ ha atsu awu ufang unga adzowe idɛm-
Num ra arhimnga, nu arhim anera ikɛi.

⁴ Unera asi iděě asɛnga itsinga ri imor iyɛɛ,
bɔr awu Unum ukpekũ awuri iděě asɛng unga, ru
nyaka unga aka asɛng Uharuna.

⁵ Rimi hã ikɛi Ukiristo asi ibeeka itsinga ikpikpoi
iyiki iwe Ukugɔng Uwuku Udzowe Idɛm-Num. Bɔr
awu Unum agɔr unga agɛ,
<<Ungo uwu ungwěmum,

irherɛ umum iwu Utɛngo.>>*

⁶ Unga abvui arherhe ra anang akɔɔ agɛ,
<<Ungo uwu uner uwuku udzowe idɛm-Num uwu
ugbagbaa,
ri it̩ itser iyi Unum ru nyaku Umarhk-
izadak.>>†

⁷ Ri ivang Uyesu aka awe ri iyor ru upfung, unga
afɛn-Num nggu iciu akpe atsotsorake nu anyĩ, afɛn
uwuruwi aka aměě ifɔrhe unga ra akpe, agũmbɔ

* **5:5** Àka anyã ikɛi: Amb 2.7. † **5:6** Àka anyã ikɛi: Amb 110.4.

unga ubinkutsu unga awu uner uwuku udɔsu Unum na adzowe unga imor.

⁸ Unga awu Ungwē Unum, bɔr unga amesi ididɔsa ru utsīndī ayetnumkε unga aka ahwa,

⁹ unga aka amaa ihwa ayetnumnga kishoo, umbɔ atsu unga awe utsīndī ififɔrh iyi ugbagbaa ru kishoo abika adɔsa unga.

¹⁰ Unum atsu unga awe Ukugɔng Uwuku Ud-zowe Idεm-Num ri itɔ itser iyi Unum ru nyaku Umarhkizadak.

Igbiir ato ri idzipu undzing ri imangmang

¹¹ Umεn iwe ra abin arherhe umεn iki irherhe ra akεε ha, bɔr aghong umεn iki idεyiwa umbi agbena, ubinkutsu, umbi asi ifēr hūmbi idzursu.

¹² Icεε imēngge umbi awe abika umumesuwe, bɔr utsekε icεε umbi abee unera abvui amesuwa umbi angwēr hā abina akɔɔ ra Arherhu-Num. Umbi abee abē, ubinkutsu, umbi asi idēē aghambi ubingha akakū!

¹³ Ubεn uwuruwi abē aka awe ubinghanga awu irheng ungwē, asi ihwεnga imesa iyiki irhika.

¹⁴ Bɔr ubingha akakū uwu ukerketakpɔ. Akakū hā adēē asεngmbɔ iyiki ize ri iyiki ibewe, ubinkutsu umbɔ ubεn unum ani ikū ihwihwεngmbɔ iyiki irhika.

6

¹ Nggee, umεn itsu amεnmεn ri iwe akakū, asi iwea irherha arherhe ri itsi abinkε umεn iki imesa ri itsi Ukiristo ri inggbaashia ukpekū, akirakε aka awu atar idzin aki imangmangmεn. Ake awu

idzidzipa ri ifere iki ikũ umen izĩ ra akpe ni iwe ru imangmang ru Unum,

² arherhi imesa iyi ubotisima, nu itsorhuwe abok, nu isisok ra akpe, nu itsu uvau iyi ugbagbaa.

³ Imēēngge umen iwe akakũ, Unum aba abemunga.

⁴ Abirabe aka anyãmbɔ irhirhang iyi idzidzerhe Unum na aka abanga agũmbɔ izũwãnga, abirabe aka akpombɔ iwu awerhu uzãrhã Ipfu Isarsatangge,

⁵ na aka abangumbɔ ize Arherhu-Num nu ijee ivangye uku iba unuma,

⁶ na abvui adzipu undzingmbɔ ru Unum, isi ídēē iwengge uge umbɔ abvui akũ umbɔ adzipa aba ru Unum. Akere awu idzidzerhe, ubinkutsu iwu uge umbɔ aka abvui anyapuwe Ungwē Unum na adzowe unga atsa ra awiya.

⁷ Abĩke aki ihwa inai uben unum ngge idoi nu ake aka isaka amerke abin aka awe ru ugarh ra abirabe iki ikau ake, abĩ hã rakɔ iki iyēi idorh Unum.

⁸ Bɔr abĩ aka amer ididɔk nu undzi, ashike ru ugarh nukpɔ. Abĩ hã Unum aka ayoka itsu ake ikponum. Ri imimaa ikēi awuri ikpĩwe ake.

⁹ Umbi awerhamen umen iki ĩbema akarhãrhã, umen irherhumen rimi hã, bɔr umen iwemen ri ikeramen uge umbi awe ru udĩ uku uze, udĩ hã uwu ukpu ififorh.

¹⁰ Unum asi iwea ri ida irhirhika, unga asi íyiruka itsermbi nu ibibemaye umbi aka adeyiwe unga ri iyiyikeye umbi aka akorhuwe abika adɔsa, ru nyaka umbi aki ikorhe.

¹¹ Umēn ibee ubēn unera ru umbi atsu asunga ri idēyiwe ikikorhe ha azī atsī imimasha, ngge itsú umbi akpo ubinkpi umbi aka afosa.

¹² Umēn isi ibeemēn umbi awe ru igherha, bər àka akorhe ru nyaka abirabε aka iyēi ubinkpi Unum aka abemuwe ru ubok imangmang nu ibibimambɔ.

Itsuiƿer ibibemuwe-Num

¹³ Ivangyε Unum aka abemuwe Uibrahim, uwɔɔ aka ananga Unum ashia, nggee unga ayirh nggu itsinga,

¹⁴ agε, <<Awu idzidzerhe umum iwuri itsuka ungo idorh, umum iwuri itsu unangngo uwe urherhe.>>*

¹⁵ Mɔcε Uibrahim aka abima adzεu, ayεisa ubinkpi Unum aka abemuwe unga.

¹⁶ Anera aka isaka ayirh ri itsok unerwi aka ananga umbɔ, uyirh ha udēyiwe ugε arherhanga awu idzidzerhe na akenke ubēn uning.

¹⁷ Unum abee idēyiwe ukupēē ra abirabε aka awe abi ukam ra abinkε unga aka abemuwe ugε abinkε unga aka abee ikorhe asi ífaruke. Nggee unga atsuafēr nggu uyirh.

¹⁸ Ibibemuwe nu uyirh ha asi ífaruke, ubinkutsu, Unum asi ídēē agberangwī. Unum atsu ibibemuwe nu uyirh ha ngge itsú umēn abirabε iki itī izī ru unga akaa umēn, umēn idēē ikpɔmmēn ifosayε umbɔ aka atsu ra asumēn na adzaa umēn ififita akarhārḥā.

¹⁹ Umēn iwe ru ifosa iyεε ngge iwe ubinkpi uku ukpɔm urhemēn, ake ashike ni iwei nggu icicang.

* **6:14** Àka anyā ikei: Ing 22.17.

Ake anu itsĩrhã ru unørkang andzing urhaburhe anangke aka asar anangke ananga kishoo,

²⁰ anangke Uyesu aka agbaashia azĩ ri itsimèn. Unga awu Ukugong Uwuku Udzowe Idem-Num uwu ugbagbaa ri itõ itser iyi Unum ru nyaka Umarhkizadak.

7

Umarhkizadak uwuku udzowe idem-Num

¹ Umarhkizadak ha awu uyerhu Usarhim na awu uwuku udzowe idem-Num uwu Unum Uwuku Ugonga. Agbopu Uibrahim aka adzeki iwaye unga aka atang nggu ayehe arherhe agha inggbaashi, Umarhkizadak atsuke unga idorh.

² Uibrahim adzowe unga unying ra abina usoka ru uben abinnga. Agben Umarhkizadak awu, <<Uyerhe irhirhika.>> Ikei unga awu Uyerhe Usarhim, agbena awu, <<Uyerhe ididõr.>>

³ Asi ideyiwambõ umen ubin ri itsi ute Umarhkizadak use uyanga use atokanga. Asi ideyiwambõ umen unum imarnga use unum akpenga. Unga awu uwuku udzowe idem-Num uwu ugbagbaa ru nyaku Ungwẽ Unum.

⁴ Àka arhi anyã ikpũ imornga. Uko Uibrahim utokamen adzowuka unga unying ra abinnga usoka ra abinke unga aka akpo ri iwa!

⁵ Ri Íkpem awu ufang abi Urhawi aka awe abika adzowe idem-Num ayei ubina unying ra abina usoka ra abin aner Uisrairha aka awe, nu ngge iki iwe uge umbõ awu unang Uibrahim.

⁶ Umarhkizadak aka asi iwea unang Urhawi, bõr unga ayeisa ugau unying ra abina usoka ru

Uibrahim, na atsukuka idorh ru Uibrahim uwuku uwe ru ibibemuwe iyi Unum.

⁷ Iicang ishingge uwuku utsuke idorh ananga uwuku uyei idorh.

⁸ Ru utsĩndĩ uwɔɔ, abi Urhawi abirabɛ aka ikpe ayeimbɔ ugau unying ra abina usɔka, bɔr ru utsĩndĩ uwɔɔ, Umarhkizadak uwuruwi umbɔ aka agɔr agɛ unga awe nggu urhɛ ayei.

⁹ Urhawi nibikanga ani iyei ubina unying ra abina usɔka ha, bɔr adẽẽ agɔrmbɔ agɛ unga aka afasa ubin ukpunga ru ubok Uibrahim ivangyɛ Uibrahim aka adzowe unying ra abina usɔka ru Umarhkizadak.

¹⁰ Urhawi ana awu ri iyor Uibrahim ri ivangyɛ Uibrahim aka adzowe unying ra abina usɔka ru Umarhkizadak.

Uyesu awu ru nyaku Umarhkizadak

¹¹ Idzidzɛrhe, umbɔ aka adzowe anera Ikpem hã, adzowe umbɔ nggu ikpem itser iyiki idzowe idɛm-Num Urhawi nu unangnga aka akorhe. An-
era aba adẽẽ awembɔ abika arhika ru ubok idzowe idɛm-Num urhawi nu unangnga aka akorhe, awu use utsu umbɔ abee uwuku udzowe idɛm-Num uwɔɔ aka iba, uwuruwi aka awu uner uwuku utɔitser iyi Unum ru nyaka Umarhkizadak, isi iwengge ru nyaku Uharuna?

¹² Ivangyɛ umbɔ aka afaruwe ikpũ idzowe idɛm-Num, awu ufang umbɔ afaruwe Íkpema.

¹³ Uyesu uwuruwi umbɔ aka arherhe abin hã ri itsinga, asi iwea unang Urhawi, unera unying ra atokanga anasi iwea uner uwuku udzowe idɛm-Num.

14 Iwu idzidzerhe Uteijeemen adzeku unang Uyahuda, abirabe Umusa aka asi irherhunga uge umbɔ awe abika adzowe idem-Num.

15 Umbɔ awuri igbisha ahwengmbɔ ubinkpi umen iki irherhe uba uwɔɔ uwuku udzowe idem-Num ru nyaku Umarhkizadak adzekanga.

16 Asi isengmbɔ uner ha ri itsi ikpem atokanga, bɔr iwe ri itsi urhenga uku usi idēē umaamgbɔ.

17 Ubinkutsu umbɔ adzowe ideka ri itsinga ra Arherhu-Num uge,

<<Ungo uwu uner uwuku udzowe idem-Num uwu ugbagbaa,
ri it̃ itser iyi Unum ru nyaka Umarhkizadak.>>*

18 Angwēwe ikpem iyi isha ri ibanga ubinkutsu ngge ishingge ri ijee nu ugarh,

19 ubinkutsu ikpem isi itsu anera arhikumbɔ. Bɔr ifosa iyiki izea iki idzekangge, ru ubokngge umen iki iba ikhapa ru Unum.

20 Unum atsu ngge nggu uyirh! Abika adzowe idem-Num abɔɔ asi itsimbɔ itser nggu uyirh.

21 Bɔr unga awu uwuku udzowe idem-Num nggu uyirh ri ivangye Unum aka agɔr unga age,
<<Uteijee aka ayirha,

asi ifarunga amenna age,
<Ungo uwu uwuku udzowe idem-Num ugbagbaa.>>†

22 Uyirh ha udeyiwe uge Uyesu awuri itsu ibibemuwe-Num iyiki izea iwe.

23 Abika adzowe idem-Num hã awu arherhe, ubinkutsu akpe aka isaka aken umbɔ itsermbɔ.

* 7:17 Àka anyã ikei: Amb 110.4. † 7:21 Àka anyã ikei: Amb 110.4.

²⁴ B̄r Uyesu awu uwuku udzowe id̄m-Num ugbagbaa, ubinkutsu unga awe ru urh̄e uwu ugbagbaa.

²⁵ Nggee ic̄ēe nu ugbagbaa unga im̄ē if̄rhe kishoo abirab̄e aka aba akhapa ru Unum ru ubok unga, ubinkutsu unga ab̄ek ugbagbaa na afene-Num ru umb̄o.

²⁶ Ikp̄ Ukuḡng Uwuku Udzowe Id̄m-Num uw̄ē ha um̄n iki ibee, unga awu asarsataw̄o, ashia ru uvau, aka ats̄w̄ukumb̄o unga ra anang abi arhim na ak̄u unga az̄imb̄o ra anang ikpikpoi akaḡnga ra af̄a.

²⁷ Unga asi iwea ru nyaka Ukuḡng Uwuku Udzowe Id̄m-Num ab̄o, abirab̄e aki idzowe id̄m-Num inuma ni inuma, agbaashia adzowe id̄m-Num iyi arhimmb̄o, m̄ōē na adzowe iyi arhim anera. B̄r Uyesu adzowe itsinga awe id̄m-Num ru arhim anera idiki unying ugbagbaa ri ivangȳe unga aka adzowe itsinga akpe.

²⁸ Anera kishoo ani ikorha arhim na akpe. Íkpem Umusa ini is̄ng Akaḡng Abika Adzowe Id̄m-Num ra aner ha, b̄r uyirh̄ ha uku uba ru undzing Íkpem, us̄ng Ungw̄ēwi umb̄o aka atsu unga awu undzumu Ukuḡng Uwuku Udzowe Id̄m-Num uwu ugbagbaa.

8

*Ukuḡng Uwuku Udzowe Id̄m-Num
uwu ibibemuwe-Num iyiki ifa*

¹ Itsi arherhamen ru ubinkpi umen iki irherhe unggakpi, umen iwemen ru Ukugong Uwuku Udzowe Idem-Num, aka ase nu ubok ugha anang isei Uwuku Ugonga ra afã.

² Unga hã ikɛi ani itõ itser ri Iya-Num, utsurha idzidzerhe uwu Unum, akirakε Uteijee unga adzin, asi iwea abok anera.

³ Uben Ukugong Uwuku Udzowe Idem-Num aseng unga idzowe izũwã nu idem-Num, nggee awu ufang Ukugong Uwuku Udzowe Idem-Nummen hã ikɛi awe ru ubinkpi unga aka idzowe.

⁴ Unga aba awe ru upfung, unga asi iwea uwuku udzowe idem-Num, ubinkutsu ishaisha umbõ atsu abõ awe abika adzowe izũwã ri igigor Íkpem Umusa.

⁵ Atõ itser ri Iya-Num, ikirike iki iwu uzirhzi anangke aka awe ra afã. Akere ha atsu umbõ avange Umusa ri ivangye unga aka awuri itar utsurha Unum. Umbõ agor age, <<Ukorhu uben ubina uwe ru nyaka umbõ aka adeyiwa ungo ni igũ hã.>>*

⁶ Bõr itserye Uyesu aka ayei inangge iyi abika adzowe idem-Num ru nyaki ibibemuwe-Num iyiki ifa ha unga aka atsu ngge iwe, inangge iyiki agbe ha, ubinkutsu ibibemuwe-Num iyiki ifa ha ikũwa umen abin aka azea.

⁷ Age ibibemuwe-Num iyi inggbaashia isi igbange, umbõ asi ibeembõ iyõ.

⁸ Bõr Unum anyã igbigba ra anera na age, <<Uteijee unga agor age, ivanga niyõ ibarõ, umum iwuri ibemuwe abi iya Uisrairha nu iya Uyahuda ibibemuwe-Num iyiki ifa.

* **8:5** Àka anyã ikɛi: Idzi 25.40.

9 Isi íwengge ru nyaki ibibemuwe iyiriye umum
 iki íbemuwe nggu atokambɔ,
 ri ivangye umum iki ikpɔm ubokmbɔ
 ikũna umbɔ ídzek ra abí Umasar.
 Umbɔ asi ikorhumbɔ ubinkpi umum iki ibee ri iyei
 ibibemuwemum,
 ngge itsu umum ídzipu undzingmum ru umbɔ,
 Uteijee unga agɔr.

10 Iyere iwu ibibemuweye
 umum iki íbemuwe aner Uisrairha ivang iyi ha
 iba itɔngge,
 Uteijee unga agɔr.

Umum iwuri itsuke Íkpemmum ra amɛnmbɔ,
 ikɛi umum iwuri itsenge ngge ra amɛnmbɔ.

Umum iwuri iwu Unummbɔ,
 umbɔ awu anermum.

11 Asi ímesukumbɔ adɔkambɔ,
 use uwɔɔ agɔr ungwẽmbɔ use unapumbɔ age,
 <Uhweng Uteijee,>
 ubinkutsu kishoo awuri ihwengmbɔ umum,
 udzur ra abika awe ru ugarh ukunjiir uba utsĩ
 abika awe ru ugarh urherhe.

12 Umum iwuri itsũwũkũ iyiki ibewambɔ,
 ni isi íbvui iyitumum arhimmbɔ.>>†

13 Ivangye unga aka arherha arherhe
 ibibemuwe-Num iyiki ifa ha, unga aka atsu iyi
 inggbaashia iwe iyiki igbe, ikɛi ubɛn ubin ukpuku
 ugbe uku ukɔkpɔ usi ídãrhũkpɔ nu ugwir.

9

*Idzowe igɔng ru Utsurha-Num
 uwu upfung*

† 8:12 Àka anyã ikɛi: Uiri 31.31-34.

¹ Ibibemuwe-Num iyi inggbaashia iwengge ra atsĩndĩke aka awu ufang ru umbɔ adɔsa ri idzowe igɔng ru Unum nu ikɛi ra anangke aki ikorha ake ru upfung.

² Atar utsurha Unum. Anang idēē irhirhang nu utebur iyi uborodi ukpuku unɛmuwe ru Unum awu ru udāwunga. Anang akere ha umbɔ ayisa ake Anang Akika Asar.

³ Ru undzing urhaburhe umbɔ aka ayapuwe ru untana uba utai ra abĩ awu ubā ukpɔɔ umbɔ ayisa ake Anangke Aka Asar Anangke Ananga Kishoo.

⁴ Ubā hā uwekpɔ ru ubeu uzinarhi umbɔ iki ikpĩ isung umɔ, nu ikɛi akɔti ibibemuwe-Num umbɔ aka afuruwe ake nggu uzinarhi. Akɔti ha awe nggu igbong Uharuna iyiki ipfum ayerhe nu abata atarh avaa aka awe ru Íkpema usɔka Unum aka adzowe ru Umusa nu undzoma uzinarhi ukucii uku uwe ru umanna.

⁵ Ímimuna iyiki iwe ra afe, iyiriyɛ irhirhang Unum iki icipuwa ru ake, adēē ni itsi akɔti ha na adzowe uzirhzi ru utsĩmwi umbɔ aki itsũwe arhim. Bɔr icere umɛn isi idēē irherhumɛn arherhe ri itsi abin hā unying anying.

⁶ Umbɔ aka amaa igbisha abin hā rimi, abika adzowe idɛm-Num atsĩrhā ru udāwā hā atĩ itsermbɔ.

⁷ Bɔr Ukugɔng Uwuku Udzowe Idɛm-Num ukpekũ awuri itsĩ ru unɔrkān uwu uvaa, idiki unying ra amɛka. Unga awuri itsĩ nggu adzirh, unga aka iyeruwe ru arhimnga nu arhim anera aka akorhe ri ida ihwihweng.

⁸ Ru ubok abin hā kishoo Ipfu Isarsatangge ideyiwa igɛ umbɔ asi ihwengmbɔ utsĩndĩ uwuku utsĩ Ananke Aka Asar Anangke Ananga Kishoo,

akirakε aka awu ra afã, ri ivangyε utsurha Unum uwu inggbaashia aka ana adẽẽ umɔ.

⁹ Akεε ake adεyiwa umen abin ri itsi ivang iyεε. Ake adεyiwa umen ugε ízũwã nu idem-Num umbɔ iki iyεruwe isi ídẽẽ itsungge amen abika adzowe igɔng aweke uku urhirhiki.

¹⁰ Akεε ha awu arherhe ighigha nu ihwihwa nu ikpũ isisorh nggu amẽ, awu agbeyi utseku unumkpi Unum aka itsu ake awe aka afa.

Adzirh Ukiristo

¹¹ Bɔr ivangyε Ukiristo aka aba ugεε Ukugɔng Uwuku Udzowe Idem-Num uwu abin aka aze umbi aka ayɛi, unga atsĩ ru utsurha uwuku uzea uwu Unum, uwuku uwe ru imor unangmgbɔ uwu upfunga, uwuruwi asi iwea unera atar, asi iwea ikpũ imimuna iyεε.

¹² Asi itsĩa nggu adzirh ishur use aki inak. Bɔr unga atsĩ ra Anankε Aka Asar Anangke Ananga Kishoo nggu adzirhnga. Unga akorha akεε ha idiki unying ugbagbaa akpowa umen ififɔrh iyi ugbagbaa.

¹³ Adzirh ishur nu aki inak iyiki itsak nu atɔɔ ungwẽ inak umbɔ aka isaka akũ amisuwe ra an-erabε aka asi itenmbɔ ngge itsú umbɔ awe abika aten ra asu Unum.

¹⁴ Adzirh Ukiristo awuri ikorhe anangke aki ha akarhãrhã! Unga uwuruwi ru ubok Ipfu-Num iyi ugbagbaa adzowe itsinga uwuku usheru uvau ru Unum. Adzirhnga adẽẽ asorhke arhimmɛn akirakε aki ikũna umen azĩ ra akpe na atsu amɛnmɛn arhika, ngge itsú umen ima itɔ itser Unum uwu urhε.

15 Akεε ha atsu Ukiristo awe uwuruwi aka atsu ibibemuwe-Num iyiki ifa iwe, ngge itsú abirabe umbɔ aka ayisa ama ayei ukam ukpu ug-bagbaa ukpurukpi umbɔ aka abemuwe. Akεε adēē aweke, ubinkutsu unga aka akpe akpeke aka iforhe anera ra arhimke umbɔ aka akorhe ri izharhuwe ibibemuwe-Num iyi inggbaashia.

16 Unera aba abemuka awekacinga ukamnga, awu ufang umbɔ adzeu unga akpe kata nu umbɔ adərha ayei,

17 ubinkutsu, ibibemuwe iyi ukam isi íwengge utseku uner ha aka ikpe. Ibibemuwe ukam ha isi ídēē iwengge uba uner uku ubemuwe ha ana awu nggu urhe.

18 Ngge itsu umbɔ akū adzirh atsu ibibemuwe-Num iyi inggbaashia itō itser.

19 Ivangye Umusa aka amaa isome uben Íkpem ra anera ha kishoo, unga anyangu adzirh íbū nu angwē inak, atoma nggu amē na anyangu ayerhe umbɔ iki iyisa uizob nggu igwar idai umbɔ aka atsu ngge iwu iyiki ibārḥā akū amisa adzirh ha ru ubvur Íkpem hā nu atsi anera.

20 Agər age, <<Akεε ake awu adzirh ibibemuwe-Num, ibibemuwe iyiriye Unum aka adεyiwa umbi adɔsa.>>*

21 Rimi hā ikēi, unga amisuwe adzirh ri itsi Utsurha-Num hā nu kishoo abinke umbɔ iki ikū akpoi Unum.

22 Idzidzerhe, ri Íkpem Umusa, abina ukunjiir umbɔ aka asi ikū adzirh atsu ake asar. Asi ídēē atsūwūkumbɔ arhim, adzirh aba asi igbake.

* 9:20 Àka anyā ikēi: Idzi 24.8.

²³ Ngge itsu awu ufang abina kishoo ru Utsurha-Num akirakε aka awe ru nyaka abin ra afã, umbō asorh ake nggu adzirh íjuε. Bør abin aki afã awu ufang umbō asorh ake nggu idεm iyiki izea iki inangnge iyi adzirh íjuε ha.

²⁴ Ngge itsu Ukiristo asi itsĩa anang akika asar anera aka adzin aka awe usaka uwuruwi uku uwe ra afã. Bør unga atsĩ ra afã hã ngge itsú unga adẽẽ ra asu Unum icεε ri itsimεn.

²⁵ Ikεi unga asi itsĩ ra afã adzowuka itsinga idikunga irhεirhε, ru nyaku Ukugōng Uwuku Udzowe Idεm-Num aki itsĩ ra Anankε Aka Asar Anangke Ananga Kishoo ubεn amεka nggu adzirhkε aka asi iweke akinga.

²⁶ Iba iwe rimi, Ukiristo awuri ihwa ayetnum arherhε udzur ru unumkpi umbō aka amunu up-funga. Bør ngge iki iwe, unga akpurha adzeka idiki unying ukpekũ ri imimaa upfunga atsũwe arhim ri idzowe itsinga awe idεm-Num.

²⁷ Ru nyaku unera aka awu ufang unga aka ikpe idiki unying, akεε aba amaa umbō awuri avarhuwe arherhenga,

²⁸ rimi hã Ukiristo awu idεm-Num idiki unying ugbagbaa anyanguwe arhim anera arherhε. Unga awuri ibvui adzekanga idevaa, asi íbanga itsũwe arhim, bør akũ ififōrh aba ru abirabε aka adzεu ibibanga.

10

*Ukiristo awu idεm-Num
idika unying ru kishoo*

¹ Íkpem Umusa iwu usaka abin aka aze aka iba ukpekũ, isi iwengge undzumu abin hã. Nggee

idem-Num ri Íkpem hã, iyiriyε umbɔ iki ikorhe uben ameka, isi idēē itsūwūkūngge arhim abika azī akhapa ru Unum.

² Uba idem-Num imēngge itsūwe arhim, abika adzowe idem-Num asi ínekukumbɔ idzowe idem-Num hã? Ubinkutsu abika adzowe igəng ru Unum adēē ikpombɔ isisar idika unying ugbagbaa, na asi ígūmbɔ ighong arhimmbɔ.

³ Bɔr idem-Num hã iwu utsīndī uwuku uyituwe arhim uben ameka.

⁴ Ubinkutsu, adzirh ínak nu aki íbū asi idēē atsūwūke arhim.

⁵ Nggee ivangyε Ukiristo aka atsīwã ru upfung, unga agɔr Unum agε,

<<Ídem-Num nu ízūwã ungo usi ibeengo,
bɔr ungo uku udzaango umum iyoryε umum iki inēmuwe.

⁶ Ídem-Num iyiki ikpikpī nu ídem-Num iyiki itsūwe arhim
ungo usi igūo iben ngge.

⁷ Mɔcε umum igɔr igε, <A Unummum, umum uwi iki íba ikorhuwa ungo ubinkpi ungo uku ubee,
ru nyaka umbɔ aka atseng ru ubvurngo ri itsimum.> >*

⁸ Ri inggbaashia unga agɔr agε, <<Ídem-Num nu ízūwã nu ídem-Num iyiki ikpī nu ídem-Num iyiki itsūwe arhim ungo usi ibeengo, ungo usi igūo iben ngge.>> Bɔr awu Íkpem itsu umbɔ akorha akεε ha.

⁹ Mɔcε unga agɔr agε, <<Uмум uwi, umum iki íba ikorhuwa ungo ubinkpi ungo uku ubee.>> Unga

* **10:7** Àka anyã ikεi: Amb 40.6-8.

adene idem-Num hã iyi inggbaashia ri ifena ngge itsú unga aden idem-Num iyi uvaa.

¹⁰ Ivangye Uyesu Ukiristo aka akorhu ubinkpi Unum aka abee unga akorhe, umbɔ atsu umen iwe asasar ru ubok unga aka adzowe itsinga awe idem-Num hã idiki unying ugbagbaa.

¹¹ Uben uwuku udzowe idem-Num adẽẽ itser uben unum adzowe idem-Num idikunga irheirhe, bɔr ngge isi idẽẽ itsũwũkũngge arhim.

¹² Bɔr ivangye Ukiristo aka adzowe idem-Num idiki unying ri itsuwe arhim ugbagbaa, unga ase ru ubok ugha Unum.

¹³ Udzur ri ivang hã unga anu idzeu utsɛku umbɔ aki itsu anggamtsaknga awe ubin uku utsorhe andaidaknga.

¹⁴ Idem-Num iyi idiki unying hã ngge itsu anera awu asarsatambɔ na awu undzumunga ugbagbaa.

¹⁵ Ipfu Isarsatangge ikei idzaangge umen ideka ra akere ha. Ni inggbaashia igɔr igɛ,

¹⁶ <<Uteijee agɔr agɛ,
ibibemuwe ha iye umum iki ikorhe nggu
umbɔ
inum hã iba imaangge,

umum iwuri itsuke Íkpemmmum ri iferhkɔmbɔ,
ikei umum iwuri itsenge ngge ra amenmbɔ.>>†

¹⁷ Mɔce unga atoma agɛ,
<<Umun isi íbvui iyitumum arhimmbɔ
nu iki ibewambɔ.>>‡

¹⁸ Ivangye umbɔ aka atsũwe abin akere ha, asi íbvui abeembɔ idem-Num iyiki atsũwe arhim.

† **10:16** Àka anyã ikei: Uiri 31.33. ‡ **10:17** Àka anyã ikei: Uiri 31.34.

Uyisa ukpuku ububima

¹⁹ Umbi angwēmēn nu anapumēn, umēn iwemēn ri ikeramēn iyiki iwe nggu Unum ugēē umēn iki itsī ra Anankē Aka Asar Anangke Ananga Kishoo ri ijee adzirh Uyesu.

²⁰ Unga atsuruwa umēn utsīndī uwuku ufa uku ukūwā umēn urhē. Utsīndī hā uwe ru ubok urhaburhe ha ungo iki itōng utsī ra Anangke Aka Asar Anangke Ananga Kishoo. Urhaburhe ha uwu usaka iyor Uyesu.

²¹ Umēn iki iwemēn ru nggaa uwuku udzowe idēm-Num uwuruwi iki idzēu abi Unum kishoo.

²² Nggee, umēn ība ikhapa ru Unum nggu amēn aki idzidzērhe nu imangmang iyiki iker nu amēnkē aka atēn na ashike ru ifērhkō iyiki idēyiwa umēn igē umēn ikorhe iyiki ibewe nu ayormēn umbō aka asorh nggu amē aka atēn ikēi.

²³ Umēn idēē iker ri ifosayē umēn iki irherhe, ubinkutsu uwu ha aka abemuwa umēn awu uner idzidzērhe.

²⁴ Umēn ikaifērhkō atsīndīkē umēn iki ifituwe adōka umbō awe ru ibibema na akorha abin aka aze.

²⁵ Umēn niba inekukumēn ikikōngmēn abika adōsa ru nyaka abōō aka aneke ikikōng hā, bōr umēn itoma ri ifituwe adōka, ubinkutsu umēn inyāmēn unum ibiba Ukiristo uku uyokpō.

²⁶ Umēn iba idzum ikorha abin arhim umēn iki imaa iyēi ihwihwēng idzidzērhe, idēm-Num iyiki itsūwe arhim ibvui ishingge.

²⁷ Bōr umēn ikpurhi iwe ru iwei itsu uvau nu nggaa urhakpi uku ikpīwe abirabē aka akpēmbo Unum.

28 Uben uwuku ukpēē Íkpem Umusa, umbō adēē afērmbo unga asi ígũmbō atorh uba inera ivaa use itaar adzowukumbō ideka ri itsinga.

29 Uba umbō atsu ufai akpe ru unerwi aka akpēē Ikpem, ri ifērhkōmbi, awuri ikorha aguse ru unerwi aka akwēete Ungwē Unum, na anyanga adzirh ibibemuwe-Num ha umbō aka akũ asare umen awe aka atārḥā, na arhenu Ipfu-Num iyi imimuta? Awuri ikorha anangmbō rimi hā.

30 Ubinkutsu umen ihwengmen unga uwuku ugōr agē, <<Ififai iwu iyimum, awu umum iwuri ibvui ifase umbō iyiki ibeweyē umbō aka ako-rhe.>>§ Abvui agōr agē, <<Uteijee unga awuri itsu uvau anernga.>>*

31 Awu ubin iwei unera agba ra abok Unum uwu urhē.

32 Àka ayita inum iyi isha umbi aka agbaashia anyā irhirhang Unum amaa, ivangyē umbi aka abima atēwā akarḥārḥā nggu ayetnum ru ubok abōō.

33 Ivang iyōō umbō arhena umbi na adzaa umbi uver ra awiya, ivang iyōō umbi agbopa atsimbi nggu abika ahwa ikpū ayetnum hā.

34 Umbi agũmbi atorh abirabē aka awe ru ug-borzī na awembi ru itēnamen ivangyē umbō aka avur abinmbi, ubinkutsu umbi ahwengmbi agē umbi awembi ru ubin ukpuku uze unangkpō nu uwe ugbaabaa.

35 Nggee àka niba atarkumbi iker amenmbi, ngge iwuri idzaa umbi nggaa itosa.

§ 10:30 Àka anyā ikei: Iva 32.35. * 10:30 Àka anyā ikei: Iva 32.36; Amb 135.14.

³⁶ Imēngge umbi abima, ngge itsú ri ivangyε umbi aka imaa ikorhu ubinkpi Unum aka abee, umbi awuri iyεimbi ubinkpi unga aka abemuwa umbi.

³⁷ Itsεng Arherhu-Num igər igε, <<Ri ivanga ukunjiir,
unga uwuku ububa ha awuri ibibanga,
asi ídārĥūnga.

³⁸ Bər unermum uwuku urhika awuri ibek ru utsĩndĩ imangmang.
Amēnmum asi ígũke iben unga,
unga aba agũ iwei abvui azĩa ra andzing.>>†

³⁹ Bər umēn isi iwemēn ikpũ abika agũ iwei na abvui azĩ ra andzing azĩa atsim, bər umēn iwe abika awe ru imangmang na akpo ififərĥ.

11

Abi imangmang

¹ Imangmang iwu ikeramēn ru ubinkpi umēn iki ifosa, ihwεng abinkε asu aka anasi inyāke ugε awu idzidzεrhe.

² Iwe ru ubok imangmang ĥā Unum aka ayēi abi isha.

³ Awe ri imangmang umēn iki ihwεng ugε Unum akũ irĥem amunu upfunga, ngge itsú abinkε umēn iki inyā, asi imunumbɔ ake ru ubok abinkε umbɔ aka adēē anyā.

⁴ Awe ru ubok imangmang Uhabirĥa aka adzowe Unum idēm-Num iki izeyε iki inangngge iyi Ukayinu. Awe ru ubok imangmang umbɔ aka anyā unga arhiku uner, ivangyε Unum aka arherhi iyiki ize ri itsinga ri iyēi ízũwānga. Unga

† **10:38** Āka anyā ikei: Uha 2.3,4.

aka akpea, b̄or ic̄er̄e ru ubok imangmangnga unga ana arherha arherhe.

⁵ Awe ru ubok imangmang umb̄o aka ashupu Uen̄ok nggu urh̄e ngge itsu unga asi inyãã akpe. Asi inyãmb̄o unga, ubinkutsu, Unum aka ashupa unga azĩa. Anera ahw̄engmb̄o uḡe Uen̄ok atsu Unum agũib̄en, umb̄o ad̄orha ashupa unga.

⁶ Imangmang iba ishingge, asi ídēē atsu Unum agũa ib̄en, ubinkutsu awu ufang kishoo uwuku uba ukhapa ru Unum awe ru imangmang uḡe Unum awea, ik̄ei unga ani idzowe itosa ru kishoo abika abeea unga.

⁷ Awe ru ubok imangmang, Unuhu aka agbishu ukhukh̄o am̄ē ukuḡong ngge itsú unga af̄orh̄ aner iyanga ri itsi abin aka abewe Unum aka ad̄eyiwe unga aḡe awuri ibake. Unga akorha ak̄er̄e ha ubinkutsu unga awea ri iwei Unum akarh̄ār̄h̄ã. Ri ikorha ak̄er̄e unga atsu uvau ru upfunga nu unga awe uner uwuku ukpo ukam irh̄irh̄ika iki iba ri imangmang.

⁸ Awe ru ubok imangmang, Uibrahim aka ad̄osu Unum ri ivangȳe Unum aka ad̄eyiwe unga azĩ abĩ akase, akirak̄e unga aka abemuwe unga aka iwe uner ukam ake. Unga ad̄osa azĩã, unga uwi anasi ihw̄enga anangk̄e unga aka izĩ.

⁹ Awe ru ubok imangmang unga aka awu utsen aseï ra abĩ h̄ã Unum aka abemuwe, unga aseï ru atsurha, unga nu Uishaku nu Uyakubu, aka akpo ukam ibibemuwe ha ru unga.

¹⁰ Uibrahim ad̄ēē idz̄eu uteukpi Unum aka igbisha na adzin, uteu ha uwe ru atarh̄ idzin aki ugbagbaa.

¹¹ Awe ru ubok imangmang Usaratu aka adēē amar ungwē ri ikōner, nu ngge iki iwe uge unga awu ukpirh. Unga adēē amara ubinkutsu awea ri imangmang uge uwuku ubemuwe ha awu uner idzidzērhe.

¹² Nggee ru ubok Uibrahim, uwuruwi aka akōō akpurha abōr akpe, umbō amar anang arherhe ru nyaki idzēr afā use ru nyaku uzuzeu ra abang ukau ukugōng umbō aka asi idēē avarhumbō.

¹³ Kishoo aner abere ase ri imangmang. Ivangye umbō aka akpe, asi iyeimbō abinke Unum aka abemuwe umbō, bōr umbō anyāmbō abin hā uku ukaa na agūmbō iben inyā ake. Ikei umbō abemumbō uge umbō awu atsen na asi iwembō abi upfung.

¹⁴ Abirabe iki idzowe ikpū ideka iyere adeyiwe ra awiya uge umbō abee abī akimbō.

¹⁵ Umbō aba adēē ikaiferhkō ri itsi anangke umbō aka abore, umbō awuri ikpombō ivang iyiki ibvui izī.

¹⁶ Nu ngge iki iwe rimi, umbō atsu amenmbō abee abī aka azea, akirake aka awe ra afā. Nggee, Unum asi igūa atsa umbō ayisa unga uge unga awu Unummbō, ubinkutsu unga aka agbishuka uteu ru umbō.

¹⁷ Awe ru ubok imangmang ivangye Unum aka aviru Uibrahim, unga anemuwe Uishaku awu idem-Num. Unga aka ayei ibibemuwe ha, ibōr uku ukpere unga afere unanyī ungwēnga,

¹⁸ nu ngge iki iwe uge Unum aka arherhunga nggu Uibrahim age, <<Awu ru ubok Uishaku ungo uku ikpo unangwi umum iki ibemuwa ungo.>>*

* **11:18** Àka anyā ikei: Ing 21.12.

19 Uibrahim avarhe ra amɛnnga agɛ awu idzidzerhe Unum adɛɛ azituka unga ra akpe. Unera adɛɛ agɔra agɛ ungwɛnga aka akpea na abvui aba ru unga.

20 Awe ru ubok imangmang Uishaku aka atsuke idorh ru Uyakubu nu Isuwa ra abinkɛ aka iba ra asu.

21 Awe ru ubok imangmang Uyakubu, ivangyɛ unga aka abee ikpe, unga atsuke idorh ra angwɛ Uyusuf ikivarhambɔ. Unga asũrhĩ itsinga ri ig-bongnga na adzowe igɔng ru Unum.

22 Awe ru ubok imangmang, ivang akpe Uyusuf iki iyo, unga arherha arherhe akika adzek abi Uisrairha ru Umasar, na adɛyiwe umbɔ ubinkpi umbɔ aka ikorhe nggu apfupfu iyornga.

23 Awe ru ubok imangmang umbɔ abika amar Umusa awɔke unga afɛɛ ataar, ubinkutsu umbɔ anyã ungwɛ hã awuwea, ngge itsu umbɔ asi igũmbɔ iwei arherhe uyɛrhe.

24 Awe ru ubok imangmang Umusa aka aseng, unga akpɛɛ umbɔ ayisa unga agɛ ungwɛ unapa Ufir'auna.

25 Unga aseng ihwa ayetnum nggu aner Unum nu unga aka igũiben arhim ri ivang iyiki ici.

26 Unga abemu iyyɛi ri itsok Ukiristo nu unga aka iwe ru kishoo abin akagɔng ru Umasar, ubinkutsu unga atsu amɛnnga ri itosanga.

27 Awe ru ubok imangmang unga aka abɔre abĩ Umasar, asi igũa iwei avɔm uyɛrhe, abimunga ubinkutsu, unga anyã uwuruwi umbɔ aka asi idɛɛ anyãmbɔ nggu asu.

28 Awe ru ubok imangmang Umusa aka aden Irhowa Iyiki Igar Utɔng, unga akũ adzirh

amisuwe, ngge itsú uwuruwi aka ifer akã angwẽ asi íbangunga abi Uisrairha.

²⁹ Awe ru ubok imangmang abi Uisrairha aka agar Ukau Ukpuku Ubãrhã ru nyaka abĩ aka akoyi, b̃or ivangyε abi Umasar aka abee igar, amẽ afere umbɔ.

³⁰ Awe ru ubok imangmang ufɔm uteu Ujeriko uku ugba ru uzẽrhãmbɔ aka adzipu ufɔm hã inuma utɔɔva.

³¹ Awe ru ubok imangmang Urahab unggoyi ha, umbɔ aka asi ifermɔ unga nggu abika akpẽẽ Unum, ubinkutsu unga ayeisa abika azĩ arhi abĩ hã ri iwɔk.

³² Nu umum ibvui irherhu use? Ishimum ri ivang iyiki irherha arherhe ri itsi Ugidiyon, Ubarak, Usamson, Ujefta, Udauda, Usamairha, nu abika asɔm Arherhu-Num hã.

³³ Awe ru ubok imangmang abere ha aka agha unggbaashi nu íyerhe, atɔ itser iyiki irhika, ayei abinke umbɔ aka abemuwe, abvure angwĩ utẽrhĩmi,

³⁴ irhiwuwe igigar ikon urha, umbɔ ashɔɔr ri ighigha akon akika ader, atsu ighɛpa iwu iker ru umbɔ, awe abika aker ri iwa, na atsu abi iwa abĩ akase atĩ.

³⁵ Akatsɛrh ayeimbɔ anermɔ aka akpe na asok nggu urhε. Abɔɔ akwɛre umbɔ ugwεε. Abika ayei ugwεε ha asi ibeembɔ umbɔ atsũwe umbɔ ngge itsú umbɔ abvui asok nggu urhε uku uzea.

³⁶ Arhena abɔɔ na akwɛre umbɔ ugwεε nggu asharhe, umbɔ akũ inyãwã abow umbɔ na atsuke umbɔ ru ugborzĩ.

³⁷ Atang atarh ru umbɔ, akũ ikon iki izharha acucii agasha umbɔ agbɛra avaa, na afere umbɔ

nggu akon aka ader. Atsim abvur itsurhi nu aki ibũ, ashimbɔ ru ubin. Asei ra ayetnum nu anera akorhuwe umbɔ iyiki ibewe,

³⁸ ayearhe ri inang uzuzeu nu ikɛi atsi igũ nu atai nu ingwĩ aki iwe ra abĩ. Irhirhika anera ru upfunga isi iyongge iyi abɛɛ ha.

³⁹ Nu ngge iki iwe ugɛ Unum adzowuka ideka iyiki ize ri imangmangmbɔ, umbɔ asi iyɛimbɔ ubinkpi Unum aka abemuwe.

⁴⁰ Unum agbisha abin aka azea ru umɛn, ngge itsú umɛn nggu umbɔ iwe uku kpengkpeng urhɔnga.

12

¹ Abɛɛ ha kishoo aka adɛyiwe ugɛ umbɔ awembɔ ri imangmang ru Unum, ikɛi umbɔ ani izerha umɛn kishoo. Nggee umɛn itare abina kishoo aka ikɛn umɛn, nu ikɛi ubɛn arhimkɛ aka akpɔm umɛn uku ugbong. Umɛn ibima ni ikorhu ubɛn abinkɛ Unum aka adzaa umɛn ikorhe.

² Umɛn itsu asumɛn ru Uyesu, unga awu uwu-ruwi aka adzaa umɛn imangmang ikɛi unga awuri iyika umɛn ngge itsuifer. Unga asi ibemunga atsa igārḥāmau ucucii ha, bɔr unga abima ngge, ubinkutsu unga ahwɛnga anggɔmkɛ aka iba. Icɛɛ unga ase i nu ubok ugha anang isei Unum.

³ Àka arhi anyã utsak uwurɛ aka abima ikpikpɛɛ abi arhim, ngge itsú umbi asi igũmbi azhe use atsũwũkumbi amɛnmbi.

Unum amesuwe amɛn ra angwɛnga

⁴ Ri ititɛwãmbi nggu arhim, umbi anasi itɛwã atsĩmbi iyi akpe.

⁵ Umbi aka ayirukumbi ififitayε umbɔ aka akorhuwa umbi ru nyaka angwēnga ri itseng Arherhu-Num? Unga agɔr agε,
<<A ungwēmum, niba ukwεerkɔ imesuwe amɛn iyi Uteijee.

Niba utsūwūkɔ amɛnnɔ unga aba atserhunga ungo.

⁶ Ubinkutsu Uteijee aka isaka amesuwe amɛn ru abirabε unga aka abema,
na amesuwe amɛn ra abirabε unga aka ayɛi umbɔ awu angwēnga.>>*

⁷ Àka abima nggu ayetnum, ubinkutsu, ake awe imesuwe amɛn Unum aka akorhuwa umbi ru nyaka angwē. Ungwē uwukusong utenga asi imesuka unga amɛn?

⁸ Awuri imesukumbɔ amɛn ru ubɛn uwɛkuci. Uba umbɔ asi imesuwambɔ umbi amɛn, umbi awu abirabε umbɔ aka amar ru ugba, umbi asi iwembi angwēnga abi idzidzerhe.

⁹ Ikei, umɛn iwemɛn ra atesmɛn abi upfung umbɔ iki imesuwa umɛn amɛn, umɛn iki isaki idzowe umbɔ imor. Imēngge umɛn igbishi iyɛi imesa iyi Utei uwu ípfu inangmɛn iyi upfung ru umɛn iwe ru urhε.

¹⁰ Atesmɛn abi upfung amesuwa umɛn amɛn ri ivanga ukunjiir ru ubinkpi umbɔ aka anyā ukpɔ urhika, bɔr Unum amesuwa umɛn amɛn ru iyiki ize umɛn, ngge itsú umɛn ima ikpo ugau ri isisar iyinga.

¹¹ Ri ivang imesa amɛn hā umɛn isi isaki ãgūmɛn ibɛn, umɛn ini igū ighong. Bɔr akεε ha aba amaake, abirabε aka ayɛi imesuwe amɛn hā,

* **12:6** Àka anyā ikei: Uny 3.11,12.

irhirhikayε umbɔ aka akpo ri imesuwe amɛn hã iwuri itsu umbɔ akpo ididɔɔr.

¹² Nggee, àka abera abokmbi akika agũ azhe na atsu atsurhukmbi akika agũ azhe aker.

¹³ Àka avi atsĩndĩmbi arhika, ngge itsú andaidakmbi akika asheri iker niba akhɔruke, bɔr awuri ikerhuke.

Igbiir ato nu ififita

¹⁴ Àka abee utsĩndĩ uwuku aseɪ uku ughwɔɔw nggu anera kishoo na awu asasar, ubinkutsu isisar iba ishingge unera asi ínyãã Uteijee.

¹⁵ Àka angwɛdzen utsur unera asi ikpoa imimutu Unum na niba neke ikpere iseng itsu ayetnum ni idakuwe amɛn anera arhɛrhɛ.

¹⁶ Unera niba awea ra anyɔna use uwuku usheri iwei Unum ru nyaku Uisuwa, uwuruwi aka agoshe ugau ukam ikɔner ukã ungwɛ ngge itsú unga ayɛi utubin ubingha unying.

¹⁷ Ru nyaka umbi aka ahwɛng, unga aka abee iyɛi ukam idorh ha iyi ukã ungwɛ, bɔr umbɔ akpɛmbɔ unga. Unga asi ikpoa ivang iyiki igbisha, nggayε unga abee idorh ha nggu anyĩ.

Igũ iyi iwei nu igũ iyi anggɔm

¹⁸ Umbi anasi ibambi ri Igũ Usinai iyiriye umbɔ aka adɛɛ abanga, iyiriye iki ikpĩ nggu urha nu uzĩ uku ugburhuk nu ufin inai nu ugba uku uker

¹⁹ nu ibar utsom nu urhɛmkpi uku itsu abika agũ ukpɔ ashɔrhã agɛ ukpɔ niba ubvui urherhukpɔ arherhe nggu umbɔ.

20 Ubinkutsu, umbɔ asi idɛɛ abimumbɔ nggu itsitsu ha iki igɔr igɛ, <<Uko ijuɛ iba ibangungge igũ hã, awu ufang umbɔ afeɾ ngge nggu atarh.>>†

21 Abin hã umbɔ aka anyã awu abin iwei akarhãrhã utseku Umusa aka agɔr agɛ, <<Iwei itsu iyormum izang.>>‡

22 Bɔr umbi aba ri Igũ Usihiyona, ru uteu Unum uwu urhe ukpurukpi uku uwe Urusharhima uwu afã, anangke ikikɔng ípfu itser-Num anera aka asi idɛɛ avarhumbɔ iki igɔmanggɔm.

23 Anang hã awu anangke ikikɔng akã angwɛ abika adɔsa aka awe, abirabɛ atsokmbɔ aka atseng ra afã. Umbi aba ru Unum uwuku utsu uvau anera kishoo, nu ípfu abika arhika umbɔ aka awu uku kpengkpeng.

24 Umbi aba ru Uyesu uwuruwi aka atsu ibibemuwe-Num iyiki ifa iwe ru ubok adzirhnga hã umbɔ aka amisuwe ake ri itsũwe arhim. Adzirh ha arherha arherhe aka aze anangke adzirh Uhabirha.

25 Àka arhi utsur umbi akpɛmbi unga uwuku urherha arherhe. Ubinkutsu umbɔ aba asi ishɔormbɔ ri ivangye umbɔ aka akpɛ uwuku udzowe umbɔ isarhe iyiki igbiir ato ru upfung, umɛn isi ishɔormɛn, umɛn íba ikpɛmɛn uwu ha aka adzaa umɛn isarhe ha iyiki idzeka afã.

26 Ri ivang hã Unum aka arherha arherhe ri Igũ Usinai, urhemnga uzusuwe abĩã, bɔr icɛɛ unga aka abemuwanga agɛ, <<Umun izusu abĩã idiki unying, ikɛi asi íwea abĩ ukpekũ, bɔr nggu afã.>>§

† 12:20 Àka anyã ikei: Idzi 19.12,13. ‡ 12:21 Àka anyã ikei: Iva 9.19. § 12:26 Àka anyã ikei: Uhag 2.6.

27 Irhem hã, <<Idiki unying ikɛi,>> idɛyiwa itsũwe abinkɛ umbɔ aka amuna aka adẽẽ izusa awuri itsũwe ake. Ngge itsú abinkɛ aka asi ízusuke ama abɔr.

28 Nggee, umɛn itar uwɛɛ ubinkutsu, umɛn iki iyeimɛn Iyɛrhayɛ iki isi ízusungge. Ikɛi umɛn id-zowe igɔng Unum nggu iwei nu imoryɛ unga aka abee,

29 ubinkutsu <<Unumɛn awu urha ukpuku ukpĩwe.>>*

13

Ififita iyiki imasha

1 Àka abema adɔka ru nyaka angwẽ uyi.

2 Niba ayirukumbi iyɛi atsen, ubinkutsu iko-rhe rimi hã itsu abɔɔ ayɛi ípfu itser-Num na asi ihwɛngmbɔ.

3 Àka ayita abi ugborzĩ ugɛɛ abow umbi urhɔnga, nu abika ahwa ayetnum ugɛɛ umbi anu ihwa urhɔnga.

4 Umbi kishoo àka adzowe imor ri ipfuna. Ukutserh nggu ukutsak awe ru idzidzɛrhe ra adɔka, ubinkutsu Unum awuri itsu uvau ru ubɛn unerwi aka atoma-dak use irha nggu unerwi unga aka asi ipfununga.

5 Àka atsũwe amɛnmbi ri ibemu uhwɛk, àka ashur nggu ubinkpi umbi aka awerakpɔ. Ubinkutsu, Unum aka agɔra agɛ, <<Umum isi ínekamum umbi, isi ítsũwãmum umbi.>>*

6 Nggee umɛn irherhe nggu ikeramɛn igɔr igɛ,

* 12:29 Àka anyã ikɛi: Iva 4.24. * 13:5 Àka anyã ikɛi: Iva 31.6.

<<Uteijee unga awu uwuku iyika umum, umum isi ígũmum iwei.

Unera adẽẽ akorhuwa umum use?>>†

⁷ Àka ayita anggbaashimbi abika amesuwa umbi Arherhu-Num. Àka arhi ikpũ isiseimbɔ na amesi imangmangmbɔ.

⁸ Uyesu Ukiristo asi ífarunga! Unga awe ru nyaka ha arhẽkẽ nu irherẽ nu ugbagbaa.

⁹ Niba neke imesa iyikise inyangungge amẽnmbi. Azea umbi akpo ififita ri imimutu Unum, asi iwea ri imesa ri itsi abingha, iyiriyẽ iki isi iyikungge abika atsu amẽnmbɔ ru ngge.

¹⁰ Umẽn iwemẽn ru ubeu ha abika adzowe idẽm-Num ru utsurha ashimbɔ ri ijee iyiki igha ubin umɔ.

¹¹ Ukugɔng Uwuku Udzowe Idẽm-Num aka isaka akũ adzirh atsĩ ra Anankẽ Aka Asar Anangke Ananga Kishoo awe idẽm-Num arhim, bɔr ijuẽẽ umbɔ akpĩwe ru undzing utepa.

¹² Ngge itsu Uyesu ikẽi aka ahwa ayetnum ru undzing utepa atsu anera asar nggu adzirhnga.

¹³ Awu ufang umẽn idze izĩ ru unga ru undzing utepa ni igasha ra atsakẽ unga aka abima.

¹⁴ Ubinkutsu umẽn ishimẽn ru uteu ukpu ugbagbaa ru upfung ukpirẽ, bɔr umẽn itsu asumẽn idzẽu uteukpi uku iba.

¹⁵ Nggee, umẽn idzowe ikpikpoi ru Unum ru nyaki idẽm-Nummẽn ru ubok Uyesu, iyiriyẽ iki iwe izũwãyẽ umbɔ aka adzowe ra angwĩ na agɔr agẽ unga awu Uteijeemẽn.

¹⁶ Na niba ayirukumbi ikorhe iyiki ize na agashu ubinkpi umbi aka awerakpɔ nggu adɔka,

† 13:6 Àka anyã ikẽi: Amb 118.6,7.

ubinkutsu ikpũ idem-Num iyere itsu Unum agũiben.

¹⁷ Àka adɔsa anggbaashimbi na akorhu ubinkpi umbɔ aka agɔr, ngge itsú umbɔ akorha akere nggu anggɔm, asi íwea nggu ibvun arherhe, iyiriyɛ iki isi íyikangge umbi. Ubinkutsu umbɔ anu idzɛu umbi nu umbɔ awuri avarhuwe irhe itsermbɔ ru Unum.

¹⁸ Àka afɛna-Num ru umɛn. Umɛn ihwɛngmɛn umɛn ishimɛn ru uvau ru ubɛn utsĩndĩã, nu umɛn ibee ikorha abinkɛ aka arhika ra abina kishoo.

¹⁹ Umum ãdzumi ibee afɛn-Num ãge Unum ama atsu umum ibvui ãba ru umbi ififitem.

Idorh nu imimasha ighwe

²⁰ Unum uwu ididɔr unga asoyiwe Uteijeemɛn Uyesu ra akpe, uner idzɛu idɔi uwuku ugɔng, ru ubok adzirh ibibemuwe-Num iyi ugbagbaa.

²¹ Unga ama adzaa umbi kishoo abina akaze ngge itsú umbi akorha abinkɛ unga aka abee, na atɔ itser ru umɛn iki itsu unga agũiben, ru ubok Uyesu Ukiristo. Ikpikpoi izĩ ru unga ugbagbaa. Iwerimi.

²² Umbi angwɛmɛn nu anapumɛn, umum ishɔrhã umbi aka akpeto ri ififitayɛ umum iki itsɛnga umbi, ubinkutsu umum itsɛnga umbi ukunjiir.

²³ Umum ibee umbi ihwɛng ugɛ ungwɛmɛn Utimoti aka adzeka ru ugborzĩ. Unga aba abanga nggimi ifitem, umum uwuri ikũ nggu unga ivangyɛ umum iki iba iyepa umbi.

²⁴ Àka aghwe anggbaashimbi kishoo nu kishoo abika adɔsa ungɔmɔ. Abika adɔsa ra abi Uitarhiya aghwe umbi.

²⁵ Imimutu Unum ima iwe nggu umbi kishoo.

Ibibemuwe-Num Iyiki Ifa Ru Dũya
Duya: Ibibemuwe-Num Iyiki Ifa Ru Dũya (New
Testament)

copyright © 2024 Wycliffe Bible Translators, Inc.

Language: (Duya)

Translation by: Dũya Development Association

Contributor: SIL Nigeria

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 8 May 2025 from source files dated 8 May 2025

3ccd0531-8578-54e4-a023-62d4592e4b27